

JA MYĪDU'UKPĪ NØKY MIDI JA PEDRO YJAAY

Ku ja Pedro tñijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxnidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia. ² Tøyip meets ja Dios Teety mwi'ejxniyi jøts ku meets ja m'u'nk'atiyit sayim ja tñiwimā'ayiyi'ñ. Yø Espíritu Santo meets ja md-abudøjkiyip, jade'en'ampyts meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømxí nbøky ja xkubajta'am ku ja chuuñ tyajxy. Dios mjanchkunuu'kxidip jøts øy tsuj xyiknaxtit.

Ja tsinaq'yin midi awejxingøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'øiyindi jøts ja jadigojk xukpaajtyin ja jujky'ajtin xemikøjxp. Xjats ja jade'en tø xja'bijkyindi jøts ja xukjøp'ijxyindi amumjoojt ja'abi jujky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy jujky'ajtpi xemikøjxp. ⁴ Paty tu'ugyi njøp'ejxin jøts ku ja Dios ja myaay xmø'øyim, pø tøxi ja t'a'ejxi jap

tsajpjøtpy pøni ti ja xmøøwya'animp midi tum øy, midi nisa kajajtp. ⁵ Jøts kumi m'ajot'ajtpy meets Dios amumjoojt, jade'ents meets ja myøk'ajtin ja mdabudøkiyi kunim meets ja jujky'ajtin xtyimbyaatt midi xemikøjxp, jøts jaanim ja tnanky'ejxit wiingyubety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaadidi yø'øbi winmaa'ñ. ⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jawyeen y'atswidø'øty winets ja yik'ijxñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sa ndyimyjagujajta'am ja øwyinmaa'ñ, ja'ats idø'øn jawaani tyimy'øy pø ka'axi ja jade'en wyindigøøy sam oori. Jade'en meets ja mjanchja'win yikmøk'ixy ku xmidanaagyøxtit ja ayo'on, ja'ats mee myiktagupøkp, nay ja'ats mee myiktawindsø'øgip myiktamøja'wip jam nwindson'ajtim wyingujkp ku ja jadigojk ñankñigaxø'øgiyt.

⁸ Mwampy mdsøjkpy meets ja nwindson'ajtim Jesucristo, m'ajot'ajtpxi meets ja' øy meets ja xjaga'ijxñim, patyts meets xmøøt'aty ja kunuu'kxin, ⁹ jøts ku xnijawidi ku ñitso'ok'atti ja m'anmija'windi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iky.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayuujk, jøts tnigajpxti jøts ku meets Dios y'øy'ajtingøjxp mmo'owa'añiyim yø yjade'embí. ¹¹ Ja Espíritu Santo midi ja Cristo tkajxp, ja' ja kugajpxy ttukmadoojidøø sa jaty

ja Cristo yiknitsokpi wyinaty yjatwa'añ ku ja y'ayo'ombaatt, jøts sa nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja yjatyimy'ukme'ent ku ja Espíritu Santo ja jade'en tyukmadøyidi. ¹² Ku ja Espíritu Santo ja jade'en tyukmadøyidi jøts ku ja ka' tpaattit t'ejxtit midi wyinaty ttunwajnip, adømnimts inet ja ixyam nbaajtyim n'ijxyim jøts ja myiktukmadowdi ja nitsoojkin ayuujk nayide'en sa jaty ja Espíritu Santo ja tø tyuknijawiyidi pøn jaty kajpxwa'kxtip jøts ku dø'øn ja jade'en tø yjaty. Ankilis paat ja tjantyimy'ejxwa'andi tjantyimñijawiwya'andi sudso'ampy adøm nnitso'ok'ajtyindi.

Xwaadso'ojimp ja Dios jøts ja ndsinaa'yin wa'ats tsuj nyiknajxint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaa'yin øy xyikyø'ødyit. Amumjoojt meets ja Dios y'øy'ajtin ja kyunuu'kxin xjøp'ejxidit midi ja yakwampy ku nwindson'ajtim Jesucristo mye'ent jadigojk. ¹⁴ Madowdi, jade'en mmado'odit sam jaa'y y'u'nk myimadøyin. Kidi jade'en m'uksinaañidi sa y'ijty mga'øchøøniidi ku Dios wyinaty ka'anim xpabøjkidi ja yja'. ¹⁵ Øy tsuj mjaa'y'attit jøts jade'en x'aduunaxtit ja Dios Teety wya'ats'ajtin y'øy'ajtin, pøn idø'øn tø mw'i'ijxyidi; ¹⁶ pø yide'enxi jap nøkyixpy wya'añ: “Øy tsuj mjaa'y'attit sam øtsin, kumi ka' ø nbøkmyøødi.”

¹⁷ Pøni mdeetyja'wip meets ja Dios Teety, windsø'øgip meets idø'øn ja ejtp, pø ja'axi ka'pxy tiidyu'ump sa pønjabøn ja chinaa'yin

tyikyø'øy, ka' pøn ja tiidyu'unin tkapaatt. ¹⁸ Jabi ja Dios Teetxyi meets tø mduknitso'ok'atyidi ja ka'øchinaa'yin midi adøm ja n'apteety'amøj tø tpmendi ttabatti; mnija'widipts wa'ats jøts kidi oorip platip ja yiktaguyajkip, windigøy'ejtpxi yø'. ¹⁹ Ja' ja yiktaguyakii'ñ ku ja nwindson'ajtim jade'en wyidsuñ wyidajxy, øy ja niti pøky tjagamøodi sam ja borreeg'u'nk y'ijty yiktamiyøxy ja Dios Teety. ²⁰ Windi'ixyip ja tanibiktaagi y'ejtni, namga'anim ja naxwii'ñit cho'onnda'aky, xjats ja yamnim tø myiñ ku kyøjxwa'añ ja naxwii'ñit jøts ja xa'ødyøkidit ma ja Dios Teety. ²¹ Ja nwindson'ajtingøjxp meets ja Dios Teety xpabiky midi tø tyikjujkyiky jadigojk xemikøjxp; jade'en'ampy ja tømø'øy ja myøk'ajtin, ja kyutujk, jøts ja njanchja'win amumjoojt, jøts tu'ugyi njøp'ejx'ejtin ja Dios.

²² Jade'ents ja m'anmija'win wa'ats y'etti ku ja Dios tyiy'ajtin xmimadojidi midi ja Espiritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios ttsøkyin. ²³ Jade'en idø'øn tpaaty, tø meets jadigojk mga'axigach, ka' meets ja ñamyayi x'ukteety'ajtni ja jaa'y midi oo'ktip tigøødyip, ja Dios meets ja kyajpxy tømikyuky'atigachidi midi nijuuni sa kajajtp. ²⁴ Kumi nømp ja':

Jade'en idø'øn naxwii'ñit jaa'dyi sam o ti ujtšin,
jøts ja tyunk jade'en sam ujtspijy midi ja
tyiknigaxø'kp.

Paty tuki'iyi wyindigøy, ti ti uktamp ku ujtš tyi'ich,
pø nayide'enxi ja pyijy wyindigøy;

25 jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2

1 Paty x'ixmatstit tuki'iyi ja mga'ødyu'unindi, ja mga'øwɣinma'andyi, wine'en mwɣn'øø'ndi, wine'en o ti mnadyawindaay'atyidi, wine'en x'amā'at'atti, xka'ødyejti, xka'øbyikta'akti pøngapøn. 2 Nayide'en sam tu'uk ja maxu'nk ñamgaxi'iky jøts ja chetsk tsojk mabaadyim tpaatwa'añ, jade'ents meets idø'øn xtsoktit ja Dios kyajpxy y'ayuujk, midi øy midi wa'ats, jøts jade'en ja mjanchja'wɣin myiweni'adø'øtstit, jøts ja nitso'ok'ajtin xpaattit, 3 pøni tødam idø'øn xjanchnijawidi ku ja nwindsøn'ajtim yja' y'øyi.

Ja Cristo dø'øn ja xemikøjxpit jujky'ajtin tyajkp

4 Mbaattip m'ejxtip ja nwindsøn'ajtim Jesús, yø' xyikjujky'ajtimp xemikøjxp, jade'en ja myøk'ajtin tjagyepy ejxim tu'uk ja jønts tsaajin. Jats may pøn tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsaa twi'ixy midi yiktunwampy. 5 Nayide'en meets sam ja pojtspi ja øybi tsaa twi'ixy midi yiktumpy ku tsaptøjk tyik'øyi. Jade'ents meets ja Dios Teety myiktunwa'añiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbikta'aky xamiyoxtit, ja' idø'øn ja jade'en mdawindsø'øgidip, jøts ja Dios Teety xkupøjkindit ku jade'en ndu'unindit Jesucristo køjxp. 6 Paty ja Dios kyajpxy wyā'añ:

Nbiktakpy øts jam Sion jade'en tu'uk ja ejx-pajt ejxim ja tsaa ma pøch cho'onda'aky, tu'ugyits ja yikpa'ext jade'en;

pøn ja tpadump jade'en, ka'ap ja wyinguwopi yjöpkuwopi, pyaatp ja øy'ajtin ja'.

⁷ Pøn yø tmøja'wip tjanchja'wip, møj yø', yø' xyiknitso'ok'ajtimp; pønts tkamøjpiktakp, pøn tka-janchja'wip jatyi, jatpts idø'øn ja yide'en sam ja Dios kyajpxy wya'añ:

Ja tsaa midi ja pojtspi kya'a'ejxip tyiktunwa'añ, ja'ats ne'egi ja Dios tø t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yø', ejxim tu'uk ja tsaa midi ja jaa'y tyagidaapy.

Jade'en yø yjatti wyinguwopidi yjöpkuwopidi ku tkabadundi ja øy ayuujk midi ñigajpxpy ja nwindson'ajtim yja'; jade'en ja Dios tø ttanibiktaagi jøts jade'en yjattit.

Pøn ja Dios ja'ajtyidip

⁹ Tum ja' meets pøn ja Dios tø wyi'ijxyidi, meets mmidumpy ja nwindson'ajtim Jesucristo yja', jade'ents meets wa'ats mjaa'y'atti jøts tu'ugyi ja Dios mja'atyidi pøn ñiwindsøn'ajtpy ja tsajpjotpit jøts naxwii'ñit, ja'agøjxp jade'en tø myikwi'ejxti jøts xkajpxwa'kxtit xkajpxyø'ødyit sa ja Dios janch øy janch møj. Nay ja'ats ojtø øy tsuj myikujajtaajkidi myikudø'kxaajkidi ku y'ijty m'etti agootstujpy. ¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyidi, mba'ayojidipts ja Dios ixyam.

Yikxon xpadu'undit ja Dios

11 Meets migu'uktøjk, tøg'ayø'øbyi adøm n'ijtyindi ya, tsajpjøtpy adøm ngugajp'ajtyindi xemikøjxp paty mee møk nminuu'kxa'aky, kidi xyikmajada'akti ja ka'øyjaa'y'ajtin midi tmimada'akwamp winjaa windsøjk ja anmija'win.

12 Jagyapti ja tuda'aky'ajtin ja øyjaa'y'ajtin ma pøn ja Dios tkanijawinim. O meets ja wine'en mjabagajpxyidi jøts mee myiktijy ka'øyjaa'dyi, kuts t'ejxti ku tnijawidi ku tsuj mjaa'y'atti winets ja Dios ja twindsø'øgidi twinjawidi jøts jade'en ja nitso'ok'ajtin tpaattit ku wyinaty ja tiidyu'unin xøøw yja'aty.

13 Ja nwindson'ajtim Jesús køjxp xkupøktit xmimado'odit ja kudunktøjk jøts ja møj windsøn,

14 jøts ja tyumbi nayide'en midi tpayø'øpy ja tundigøøbyidi ja kajpxigøøbyidi, midi'its øyjaa'y'ajttip tuda'akyyaa'y'ajttip, ja'ats y'øyja'wip.

15 Jade'ents ttsøky ja Dios jøts øy tsuj mjaa'y'attit jøts jade'en xyik'amo'ondit pøn nugo agubojidip, pøn tkanija'widip.

16 Tø meets ja øy'ajtin myikmøøñidi, jøts ka' ti nugo ajawi mmimajada'agidit. Ka' mwa'andit jøts øy sagasa m'adøøtsnidit ku ja øy'ajtin tø xpaatti. Ja' tu'ugyi mbadu'undip midi ja Dios ñi'ane'empy. 17 Windsø'øgidi winjawidi niduki'iyi sam pyaat'atyin. Tsokti ja mmigu'uktøjkti pøn nay ja'abi janchja'win pyadundip midi meets, windsø'øgidi winjawidi ja Dios, jøts nayide'en ja windsøndøjk kudunktøjk.

Ja ejxpajt midi ja Cristo tø xmø'øyim ku y'ayo'ombaaty

18 Tumbitøjkti, kajpxkyupøjkkøjxti niti jot'aka ja mwindsøndi, wan tja'awa'anidi tka'awa'anidi, wan ja tja'gyukidi tkaja'gyukidi. 19 Jabi øyxi ja' ku ja Dios tuki'iyi xamijawidit ja m'ayo'on ku myikjemandi myiktedundi niti pøkyøjxp, paty ja amgujk jotkujk xmidanidit. 20 Ku meets xku'ayo'ombaattit o ti o ma øy tsuj tø xkayik'øyidi, çti øy'ajtin meets idø'on mdsaaçpaatp? Kuts meets øy tø mjatuñ jøts kuwañim myik'ayo'ombaadyidi pøn m'ana'amidip, ya'at idø'on ja Dios y'øjja'wip ku meets tuda'agyi xkupiky'aty ja ayo'on. 21 Paty meets ja Dios tø mwaadsøyidi, jabi tøxi Cristo y'ejxpajt tyiktañ ku y'ayo'ombaaty niti akikøjxp jøts meets ja xpadu'undit jade'en. 22 Niti pøky ja tkatuñ, niwindem xøøw ja jaa'y ja tkawindaay'ajty; 23 ku ja y'ijty yikmi'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pøn jade'en tuujnidip. Dios Teety ja ne'egi tyanipijkpy ja ka'pxy tiidyunk. 24 Kø'øm idø'on ja Cristo adøm ja nbøky tuki'iyi tku'o'jkigyijxy jam kruskøjxp, jøts ka'ap adøm nyikmøj'ajtint ja nbøky jøts jade'en øy tiy ja ndsinaa'yin nyiknajxint. Pyaajt ja tsaachi'ajtin ja', jøts adøm jade'en nnitsoojkindit. 25 Jabi jade'enxi y'ijty sam ja borreegi tyigøyin, tøts meets jadigojk xniwimbity ja nwindsøn'ajtim Jesucristo pøn m'ejx'ejtidip jøts pøn ttunk'ajtp ja m'anmija'windi.

3

Sa dø'on pyaat'aty çhøønidit ja amajtsk jaa'y

1-2 Jade'en meets tø'øxyøjk̄ti, kajpxkyupøkti ja mgø'ømniyaa'dyi jøts xuk'ejxtit xuknijawidit ja tiy'aj̄tin ku meets ja mjaa'y'aj̄tin tuda'aky xyiknaxy. Jats idø'øn winaagin ja yaa'dyøjk̄ti pøn tkagupøjktipnim ja øgyajpxy ja ømyadya'aky, ja'ayi meets ja jade'en xukupøktit mjaa'y'aj̄tingøjxp, niti kajpxy niti madya'aky. ³ Jøts ka'ap meets ja mdsuj'aj̄tin xmijatt xmi'ookt midi ja'ayi nikijxy kaxø'kp ku tum ja oori, tum ja wimbatjaaxy wimbatwøøky, jøts tum ja tsowibi wet xjotmay'attit. ⁴ Jabi wa' tsuj'aj̄tinxi meets idø'øn ne'egi myiktu'ump midi m'am mjoojtp yik'øyjaa'y'aj̄tp, ja'abi midi kawindigøøpy. Janch øy ñaxy idø'øn ja jam Dios wyingujkp. ⁵ Jade'ents idø'øn y'ijtyip ñajxmi ja tø'øxyøjk̄ti pøn ja Dios yja' tpadundip ku ja nayide'en tmøøt'aj̄tti ja tuda'aky chinaa'yin. Yjanchja'widip idø'øn ja Dios ja y'ijty jøts ja ñiyaa'y tuki'iyi tkajpxkyupøjk̄idi nayide'en. ⁶ Jade'ents idø'øn ja Sara yjaa'y'aj̄ty, tuki'iyi tkajpxkyupøjk̄ijxy ja ñiyaa'y Abraham, jade'en ja tpikta'aky sam tu'uk møj øy windsøn. Pøni øy meets mjaa'y'aty, nayide'ents meets idø'øn xu'unt sam ja Sara tø tjøptuni jøts jade'en ja mniyaa'y xkatsø'øgidit.

⁷ Nayide'en meets yaa'dyøjk̄mi, ja'gyukidi ja mnidø'øxyti, windsø'øgidi sam ja pyaat'atyidi. Kidi meets ja xamøj'aty ku ja nayide'en kyamøkididi sa meets, jabi nay ja'abi øchinaa'yinx̄i dø'øn ja Dios tø myø'øyidi midi meets tø xpaaty y'øy'aj̄tingøjxp. Tundi jade'en, jøts ka'ap ja Dios mgamo'oj̄idit midi jaty m'amidoodip mbøktsoodip.

Ku ja øy'aj̄tin yiku'ayo'ombaadi

⁸ Jade'ents idø'øn xyiknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin. ⁹ Kidi meets ja kya'øybi nayide'en xyikwimbity jøts ja mmigu'uk xuk'ayojiwya'andi ja ka'øgyajpxy ja ka'øy'ayuujk. Ni'amidowip meets idø'øn ja ne'egi ja kyunuu'kxin, pø ja'axi adøm tø nyiktaniwaadsø'yim jøts ja Dios kyunuu'kxin nbaajitindit. ¹⁰ Jabi yide'enxi dø'øn ja Salmos wya'añ:

Pøni pøn idø'øn øy tsuj ja xøøw ja tsinaa'yin yiknaxwampy, y'ejx'etp idø'øn ja tyoojts ja', jøts ja yigaappi y'axøøkpi ja tkakajpxt jøts ja y'aaw tkadataay'att.

¹¹ Paat'ajtp idø'øn ja t'ixmatst ja yigaappi jøts ja y'øybi chujpi tpadu'unt ne'egi, y'ixa'ap idø'øn ja øy'ajtin jøts tuki'iyi tpanøjkxt.

¹² Jabi Dios Teetxyi idø'øn t'ejx'ejtp pøn øy jaa'y'ajttip jøts nay ja' tmado'op ja tsapkajpxy, ka'ats idø'øn ja møøt ñamyayi pøn ja y'axøøkpi yigaappi yikmajadaktip.

¹³ ¿Pønts meets idø'øn ndejint mdamidsepwa'aniiyidip ku ja y'øybi chujpi xunwan'ettit? ¹⁴ Pøni jats pøn wyinaty mjanchtuku'ayo'ombaadiyidi ku ja y'øybi xjatu'undit, øyjawidi kunuu'kxyjawidi meets idø'øn ja ne'egi, jabi møjxi ja Dios y'øy'ajtin tyikwimbejtnit. Patxyi meets idø'øn niti nipøn xkatsø'øgidit, ¹⁵ nadyamiyoxiyidi ja Cristo pøn adøm nwindson'ajtyimp. Awejx'et meets idø'øn ja',

ku pøn tyiknidøøwit tiku xpaduñ ja mjanchja'win jade'en, ku x'adsojimbettit, tsuj tuda'aky meets idø'øn ja xu'unt. ¹⁶ Yikxon meets idø'øn m'øy'att jøts xmøøt'attit jade'en ja m'aaw ja mjoojt jotkujk, jøts ku wyinaty pøn mdamigajpxyidi ja Cristo yjanchja'win, kø'øm ja kyajpxy ja myadya'aky ja ttatsø'ødyu'undit ku meets ja jade'en nugo mnitaayibyetyiyidi. ¹⁷ Øyts ja ne'egi ku ja øy'ajtin ngu'ayo'ombaajta'ant pøni jade'endam ja Dios kø'øm ttsøky jøts idø'øn jade'en ne'egi ngatu'unint ja axøøkpi ja yigaappi.

¹⁸ Jabi nayide'enxi Cristo kø'øm tø y'ayo'ombaati adøm nbøkyøjxp, tuk'ojkyi ja tø ttanaxy ja ayo'on. Øy ja y'ijty yja'øyjaa'y'i, ayo'ombaajt ja' adømgøjxp wine'en nga'øyjaa'y'ajtyindi, jøts jade'en ja Dios Teety xukwingunøjkxa'andi. O dø'øn ja ñine'kx wyindigøøy, jujky'ajtpts ja ixyam jadigojk. ¹⁹ Ja Espíritu Santo myøk'ajtin ja yiknøjkxøø mā dø'øn jap namay anmija'win t'awejxti ja y'ayo'ondi, jøts ttukmadøøy ja nitso'ok'ajtin. ²⁰ Ya'atpi jaa'dyi ku yjujky'ajttøø ka' idø'øn ja tmøjpiktajktøø ja Dios sã ja Noé tjanigajpxy yam ja Dios ja yjanchja'awijxyidi. Ixyam idø'øn wyinaty ja Noé tyik'øyi tyik'abaadi ja møj barki mā dø'øn niwaani ñitsokti, niduktujk idø'øn ja'adi ka'pxy pøn jap barkijøtptyi yikanaanwidejtidi ja møj nøø, jøts jade'en sã kyajajttøø. ²¹ Yø'øbi nøøjts ndamiguy'ejxa'amp ja nøø midi tump ku nnøbajtin midi tø xukpaajtyim ja nitso'ok'ajtin. Ka'ap ja nøbajtin ja' wya'añ jøts ja ne'kx ja'ayi wya'ats'ejtindit. Ku dø'øn nnøbajtin, ja Dios idø'øn

n'amido'owimp jøts ja nbøky xyikwaajtsa'ant. Jade'en'ampyts idø'øn ja nøbajtin tyuñ jøts ja nwindson'ajtim xukniwaajtsim ja ka'øysi pø ja'axi ja kyujjkpyøjkiyiññ jadigojk xemikøjxp. ²² Jøts ja ojs chajpety, ojs tpu'ixaagi ja Dios Teety y'aga'ngyøjø'øm, ja' tniwindsøn'ajtp ja ankilistøjk jøts wine'en y'etti niduki'iyi ja yikutujkpitøjkti, tum ja' amuum paajtip.

4

Jade'en nbadu'undit sam ja Dios ja ndunkjøøjp tø xmø'øyiñdi

¹ Tøxi ja Cristo y'ayø, nayide'en meets idø'øn xkupiky'att ja ayo'on. Ku jade'en xu'undit tø wyinaty ja pøky xkayikmøj'atti, ² jøts jade'en mjaaktsøønidit ya naxwiññ sam ja Dios kø'øm ttsøky'aty, jøts ka'ap ja mgø'øm ja' xu'undit, ja kya'øysi. ³ Tø meets xyikjotkidakøjy jekyip ku xpadundi y'ijtyip pøn ja Dios tka'ejxidip. Ja' y'agujkpy meets y'ijty mdsøøni mā ja axøøkpi yigaappi, mā ja awanax agojnax nayide'en xwindsø'øgidi xwinjawidi, midi idø'øn kapaat'ajtiyip nbadu'unint. ⁴ Ja'abi jaa'dyi, kumaap ja tjawidi ku meets ja xka'ukpadu'unxiniyidi ja y'axøøkpi yigaappi tsinaa'yin, paty meets myikjigajpxy myikpagajpxy. ⁵ Ka'ap meets ja xmøjpikta'akt, kyøyaktip ja kø'øm ja tiy'ajtin jøts ja yiktiidyu'undit, ja' ja nøjx tidiyuujnidip pøn tidiyump ja oo'kpi jøts ja jujkpyi. ⁶ Ja' pøn tø y'oo'kni, tø yiktuk'ixy yiktuknijawī sudso dø'øn ja y'anmija'win xemikøjxp ndejint y'uktsøønit møøt ja Dios. Jaayip

idø'øn ja ñamyayi tpadso'ondakni ja xemikøjxpit jujky'ajtin ku ja Dios yja' tkupøjkiyidi, øy ja kawine'en yjayiktüdyundi ya naxwiin, tjapaatti tja'ejxti ja kajkin ja o'jkin ja'adi.

⁷ Wingonipxi jits kyudigøøgyøjxint tuki'iyi ja pikta'aky, paty meets ja y'øyi winmaa'ñ xyiktu'undit jøts xamija'myatsidit ja Dios. ⁸ Ja tsojkin meets idø'øn ne'egi mmøøt'ajtp, jabi yajkpxyi ja maa'kxujkin ja', jøts ka'ap ja tsep ni ja aki ja tkayikmajada'aky. ⁹ Nagyupøkidi mjønjøtp mdøjkjøtp, pøni pøn jam memp ja'tp, kidi ti x'ama'at'atti. ¹⁰ Kija' meets idø'øn xu'unt ja mdunkjøøjp sam ja Dios tø mmøøyiidi jøts jade'en mnadyabudøkiyidit nixem niyam pøni sa Dios ja kunuu'kxin køx kida'ak tø mmøøyiidi. ¹¹ Pøni jaa pøn tniğajpxwa'añ ja Dios yja', ja Dios idø'øn ja y'ayuujk ja wyinmaa'ñ ja yiktuujnip. Pøni jaa pøn myigu'uk tpudøkiwya'añ tuki'iyi dø'øn ja tyiktungøxt ja møk'ajtin midi ja Dios yajkpy. Jøts jade'en ja Dios Teety ndamøja'wa'ant ndagunuu'kxyja'wa'ant ja ndunkjøøjp nwindson'ajtim Jesucristo køjxp, pøn tu'ugyi ja øy'ajtin ja møk'ajtin tmøøt'ajtp xemikøjxp. Jade'en idø'øn yjatt.

Ku ja Cristo nbadu'unint, ayo'ombaajtimp

¹² Meets migu'uktøjk, kidi kuma'ayin xjawidi ku møk m'ayo'ombaatti, kidi mnømdi ku jade'en kyapaat'atyi. ¹³ M'øyjawip meets idø'øn ne'egi ku meets idø'øn Cristo møøt m'ayo'ombaaty, jøts nayide'en wyinaty xaxondaknidit ku tñanky'ejxit ja myøj'ajtin ja y'øy'ajtin ku wyinaty myeni jadigojk. ¹⁴ Jotkujk meets idø'øn mnayjawiyidit ku

myikwĩngajp̄xtit myikpagajp̄xtit Cristo k̄ōjxp; jabi ja Diosxi meets ja y'Esp̄iritu Santo mm̄ōt'aj̄tip. Ax̄ōk yigaap ja nwindson'aj̄tim ja t̄nimadya'akti, ka'ap meets nayide'en, ja'axi meets mwinds̄o'jk̄ip mwĩnja'w̄ip. ¹⁵ M̄ok ts̄o'odyu'unin m̄ok paȳo'oyin ne'egi ñaxy ku nyikjaa'y'o'jk̄int ku nma'j̄tsint, ku tigati ndat̄ojka'ant ndakaj̄pxa'ant midi'ibi ad̄om xkapaat'aj̄timp. ¹⁶ Ka'ats ja ne'egi ch̄o'odyu'uni ku ja Cristo yja' ngu'ayo'om̄baaj̄ta'ant. Ndam̄ōja'wa'amp ndagunuu'kxyja'wa'amp ad̄om id̄ōn Dios ja ne'egi.

¹⁷ Ixyam ad̄om id̄ōn ndiidyunk tyuu'na'amp p̄on jaty ja Dios ja'aj̄tidip. M̄okts ad̄om ja ndiidyunk ñaj̄x̄indit, ¿sats id̄ōn ja yja' mye'endit kyida'aktit p̄on ja Dios tkabadundip? ¹⁸ Jabi ja ōyjaa'yts ja ñitsoojkin ñiyj̄ōjxk tkap̄attip, ¿sats id̄ōn ndejint tyimyj̄attit p̄on ja Dios tkamimadoodip, p̄on ja chinaa'yin tyiknaj̄xtip p̄oky'aguj̄kpy? ¹⁹ Patyts p̄on ja Dios yja' tmi'ayo'om̄baaj̄tidip sam ja k̄ōm t̄o tyamids̄okyidi, ka'ap ja m̄ibaat t'ixmatstit ja y'ōybi, tyun'etibyim ja'adi, amuum ja y'anmija'w̄in ttamiyox̄tit ja Dios p̄on yikoj̄idip yiktsooj̄kidip, nījuuni ja kyamaj̄tstu'udyidi.

5

Ku ja Cristo yjanchja'wibi yikaj̄pxwejt̄i

¹ Ixyam ngaj̄pxwejwa'añ p̄on jam mnigubaj̄k'aj̄tiȳidip, ja m̄ōjaa'dȳōjkti, jabi nayja'abi tunkxi nm̄ōt'aj̄tpy, ja ku ōts id̄ōn k̄ōmyi ndyimy'ijxy sa d̄ōn ja Cristo y'ayo'om̄baaj̄ty. Nbaatp ōts nayide'en ja ōy'aj̄tin sam nayide'en ja m̄ōjaa'dȳōjkti, ku wyinaty ja

nwindson'ajtim tɔ ttukmibaat'aty. ² Paty ɔts ixyam mee mɔjaa'dyɔjk nnɔjmididi jɔts yixxon x'eix'ettit pɔn ja Dios yja' tpaduujnidip mididi meets tɔ myiktagidɔki; kɔ'ɔmdsɔky idɔ'ɔn meets ja xu'unt sam idɔ'ɔn ja Dios kɔ'ɔm ttsɔky'aty, ka'ap akikɔjxp jɔts ni meengyɔjxp ja xkatu'undit. ³ Kidi meets ja mgutujk nugo xamajada'aky, tuda'aky idɔ'ɔn ja xuu'mo'odit jɔts ja m'ɔchinaa'yin xuk'eixpajtin'attit. ⁴ Kuts jade'en wyinaty myeni ja mɔj ejx'etpi jɔts meets xpɔkt ja mɔj ɔy'ajtin mididi niwindem xɔɔw ja kyudigɔ'ɔyin kaja'tp.

⁵ Ixyam meets unajktɔjkti ngajpxwejwamididi, mimadoow meets idɔ'ɔn tuki'iyi ja kyutujk ja mɔjaa'dyɔjkti, sam meets niduknax nixem niyam mnagyupɔkidit. Jabi jade'ents ja wijkyajpxy wya'añ ku ja Dios ka' ttsɔky pɔn kɔ'ɔm namyɔjpiktajkidip, jɔts ja' tpuɔki y'ɔy'ajtingɔjxp pɔn tmɔɔt'ajtp ja tuda'aky'ajtin. ⁶ Ku xmiduda'aky'attit ja Dios myɔk'ajtin, nay ja'ayi dɔ'ɔn kɔ'ɔm mgunuu'kxiyidip ku ja xɔɔw jumɔjt wyinaty tpaaty. ⁷ Tagidɔkidi ja Dios tuki'iyi mididi mbamaadyip mbadaajtip jabi ja'axi ja tyunk'ajtpy jɔts adɔm ja xtsojkind.

⁸ Nay'eix'etidim, wijy kejy nabyikta'agidi; jabi oxi mā y'ixy kyɔy ja miku', ja mmidsep pɔn mduk'ixmatswajniyidip ja mjanchja'win. ⁹ Mimɔk'atti, tamɔk'atti ja mjanchja'win, ja'myatsti ku nayide'en ja mmigu'uktɔjk y'ayo'ombatmididi o madsoo sam meets. ¹⁰ Ku adɔm wyinaty tɔ n'uk'ayo'ombajtyindi waani, xjats adɔm idɔ'ɔn ja Dios xyik'ɔɔ'yandit jɔts xmɔɔgyɔjxindit ja mɔk'ajtin jɔts jade'en nisa

nga'ukjajtnindit. Xpa'ayo'ondip idø'øn ja Dios ku kawinmaañi xkunuukxindi, jøts ku kø'øm tø xwaadsø'yim jøts adøm n'ejxindit nbaajtindit ja y'ø'y'ajtin ja myøj'ajtin xemikøjxp møøt ja Jesucristo. ¹¹ Tu'ugyi dø'øn ja Dios Teety myøk'ajtin møj midi niwindem xøøw ja kyugøjx'ajtin kamemp. Jade'ents idø'øn ja yjatt.

Ja kajpxpoo'kxin midi tyagugøjxiñip

¹² Yjanchpadumpy tuda'aky'ampy ja janchja'win yø Silvano adøm nmigu'uk. Ixyamts øts ja ndamigaxi tu'uk ja nøky midi tø nja'ay jøts meets ngajpxwejwa'añ jøts ku Dios kyunuukxin tø mmø'øyidi jøts jade'en'ampy tñanky'ijxyi pøni ti jaty tø xpaatti x'ejxti. Mdsojkidip meets ja Dios jøts kidi mibaat x'ixmatsti, tu'ugyi yikxon xpanøjkxtit.

¹³ Mdanigajxidip øts ja kajpxpoo'kxin ja Babilonia janchja'wibidi pøn ja Dios tø t'awaawmujkmi nayide'en sam meets. Nayide'en ja mgajpxpoo'kxmiyidi ja mixy Marcos midi n'u'nkja'wip pøn øts xpudøjkip.

¹⁴ Nagyajpxpoo'kxidi nixem niyam sam tu'ugyi ja jaa'y ñamyayidi Cristo chojkingøjxp.

Jade'en ø nwa'añ jøts ja øy'ajtin xmøøt'attit pøn ja nwindson'ajtim Jesucristo yja'ajtpy. Jade'ents idø'øn yjatt.

**Ja øgyajpxy ja ømyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

422dcf73-46a5-5403-b423-8406ed76ac1d